

BT

1548

W₃₂

1771

V. 2

辯言

張子曰曰此言有六其本本也勿言無益于世勿

言煩雜相與勿言後有流弊勿言後世之害勿言

非力所及勿言

呂叔簡曰論理要精詳論事要剛毅論人須顯明

切中人情人所難堪故君子不盡人之情不盡人之

過非左道也然與人謀面而後為捷徑之略猶非

悔悟之機亦天此言當之氣也安人之術莫善於此

行不說說人非為己為人此言當之氣也安人之術莫善於此

擇言

張子韶曰。立言有六禁。不本至誠。勿言。無益于世。勿言。損益相兼。勿言。後有流弊。勿言。往哲已言。勿襲言。非力所及。勿輕言。

呂叔簡曰。論理要精詳。論事要剴切。論人須渾厚。若切中人情。人必難堪。故君子不盡人之情。不盡人之過。非直遠禍。蓋以養人體面。而留其掩飾之路。觸其悔悟之機。亦天地含蓄之氣也。貴人之前莫言窮。彼將謂我求其薦矣。富人之前莫言貧。彼將謂我求其

習是經 卷二
濟矣。是以羣衆之中。淡然漠然。付之謹默可也。窮也。貧也。非告人而可脫者也。

范益謙座右戒曰。一不言朝廷利害。邊報差除。二不言州縣官員長短得失。三不言衆人所作過惡。四不言仕進官職。趨時附勢。五不言財利多少。厭貧求富。六不言淫媒戲慢。評論女色。七不言求覓人物。干索酒食。

伊川先生。每見人論前輩之短。則曰。汝輩且學他長處。

前輩長處儘多。正恐畢世難學。其彷彿耳。何暇更
論他短。

姚舜牧曰。經目之事。猶恐未真。聞人曖昧。切不可出
諸口。一句虛言。折盡平生之福。此語誠可深省也。
言之最不可不認者。乃是以帷箔之罪。加人。縱實
有其事。已非君子所忍言。萬一非辜。則令終身被
惡名。無論損德。亦且速患。
當厄之施。甘如時雨。傷心之語。毒于戈矛。
濟人之惡。不曰義。語人之短。不曰直。

面諛之詞。有知者未必知感。背後之議。啣之者嘗至
刻骨。彼作好作惡者。徒自苦而已。

文中子或問人善則稱之。不善則曰未嘗與久也。

願體集曰。凡人燕會交接之間。人品不齊。或行檢有

玷。或相貌不全。或今雖尊顯。而出身本微。或先世昌

隆。而後裔流落。以類推之。忌諱甚多。須用心檢點。一

番切勿犯人所忌。令人愧憤。亦君子長者之厚道也。

袁氏世範曰。人當厚密時。不可盡以私密事語之。恐

一旦失歡。則前言得憑為口實。至失歡時。亦不得盡

以切實之語加之。恐憤平復好。則前言可愧。
曾野樵云。遇沉沉不語之士。切莫輸心。見悻悻自好
之徒。應須防口。

不能受言者。不可多與一言。此是善交法。

所謂不可則止也。然必先盡忠告善道之益乃可。
范丞相曰。人作好事。不堪再說着。說着便不中。此語
最到。

不特不可說着。并不可畱滯在胸。若常將好處宿
在胸中作梗。不覺釀成大病。出來須知做得天大。

事業。不過了得本分事。如當下一頓家常飯耳。人一食不飯固不宜。一食飯不消化尤不宜。

儒與釋老教雖分門理寔一致。今儒者徒見僧道一種惡習。遂妄議二氏短長。盍思眼前儒者品行大謬。無惡不為。亦可因此以譏訕孔子乎。

有問于程子曰。見佛像當拜否。程子曰。凡具人形者皆不可慢。况佛亦是古之賢者。可不敬乎。明周文襄撫吳。喜徜徉佛刹。遇佛即致敬。或譏之。公曰。即論年亦長我二三千歲。豈不直得一拜。今人初

從塾師。受韓子原道。開口便斥佛老為異端。多見其不知量也。

福壽全書曰。聞人談一善事。述一善人。必巧為無端。不可解之語。遂奪之。使滿座闕然。而談者色沮。然後為快。既造口業。亦增意業。一生聰明用之。此處大可惜矣。

倡誣善之游詞。縱亂德之巧言。徒足以闕人之口。而不足以服人之心。非惟無以入德。亦取怨之道也。

槎菴燕語曰。庭闈簡寂。定是名流。笑語喧囂。必非佳士。

范子喟言曰。凡言語應對。忙迫無倫次者。心躁故也。不但觀德。亦可觀壽。惟時時自覺而自反之。至于詞氣安舒和緩。而不踈方。見得力。寧鳩子曰。喜極勿多言。怒極勿多言。醉極勿多言。晦翁曰。覺言語多。便檢點不到矣。福壽全書曰。言語之當慎。正在當快意時。遇快意人。說快意事。

陳眉公曰。好談閨閫。及好譏議人者。必為鬼神所怒。非有奇禍。必有奇窮。又曰。俗語近于市。纖語近于娼。諱語近于優士。君子一涉此。不惟損威。亦難迓福。又曰。捏造歌謠。不惟不當作。亦不當聽。徒損心術。長浮風耳。若一聽之。則清淨心田中。亦下一不淨種子矣。張纘孫曰。今世文字之禍。百怪俱興。徃徃倡淫穢之詞。撰造小說。以為風流佳話。使觀者神搖色奪。毀性易心。小則滅身。大則滅家。禍害天下。莫此為甚。而况綺語為殃。虛言折福。不獨誤人。兼亦自誤。

徐勿箴曰。譽人之言。不可太溢。責人之言。不可太盡。
一時雖不暢意。日後亦無悔心。含蓄之妙。不可不知。
又曰。凡看人文章。論人行事。非最相知。不可太直。既
以形人之短。亦且恃已之長。皆招尤取侮之道也。
又曰。欲人不知。莫若勿為。欲人不聞。莫若勿言。二語
宜常自警醒。

魏氏查言曰。口過最易。不可不慎。未開口。當時時提
醒。一開口。當句句檢點。大抵有補于人者。多說幾句。
有傷吾長厚者。莫出一言。

處事

荀子曰。是非疑。則度之以遠事。驗之以近物。參之以平心。流言止焉。惡言死焉。
或問張無垢曰。處事當何如。先生曰。速不如思。便不如當。用意不如平心。蓋平心則能近情合理。便無難處之事也。
薛敬軒曰。處大事貴乎明而能斷。不明固無以知事之當斷。然明而不斷。亦不免于後艱矣。
天下事無一件不是人做。然必寬綽細膩。真寔寧耐。

一一從首至尾。節次調停。方克有濟。

平心易氣。委曲周詳者。于事無不濟。然必以正直光明為主宰。方無遺憾。

朱子曰。大抵事只是一個是非。是非既定。却揀個是處行。將去。必欲回護得人人道好。豈有此理。然事之是非。久而自定。時下湏是在我者無歎。

張無垢云。快意事。孰不喜為。徃往事過。不能無悔者。于他人有甚不快存焉。君子所以隱忍詳復。不敢輕易。欲彼此兩得也。

欲求全于已者。無萬全之術。必人已兩全。乃獲萬全。

胡師蘓曰。事無大小。以理為主。然所遇之人。或愚者。不知理。强者不畏理。奸猾者故不循理。便當從容處之。寧我讓之可也。

袁氏世範曰。老成之言。雖若迂濶。而更事為多。後生雖天資聰明。而見識終有不及。後生例以老成為迂濶。及歷事多。而情理現。方悟老成之言。可以佩服。然已在險阻。備嘗之後矣。

眉公云。隱不得談仕者事。老不得幹少者事。窮不宜
隨富者事。愚不必問慧者事。乃吾人終身受用不盡
處。

袁氏世範曰。人之處事。能常悔往事之非。前言之失。
往歲之未有知識。則其德之進。所謂長日加益而不
自知也。

昔人云。彌天罪過。當不得一個悔字。固是。然所貴
于悔者。貴其改也。若知過復行。雖千悔萬悔。無補
分毫。奈何。

不實心。不成事。不虛心。不知事。

處人不可任己意。要悉人之情。處事不可徇人意。要

悉事之理。

快書云。為人謀事。必如為己謀事。而後慮之也。審為

己謀事。又必如為人謀事。而後見之也。明。

無事。如有事時。堤防可以弭意外之變。有事。如無事

時。鎮定可以銷局中之危。

退一步。前路愈寬。緊一分。到頭難解。

願體集曰。有必不可已之事。便須早做。日捱一日。未

必後日之能如今日也。行一件好事。心中泰然。行一件歹事。衾影抱愧。即此是天堂地獄。

佛氏天堂地獄之說。皆寓言耳。唐李舟云。天堂無則已有。則君子登地獄無則已有。則小人入。真通論也。世之佞佛。冀往生者。可謂痴絕。了凡先生曰。福從善。禍從惡。人孰不祈福而免禍。何不究其所從。義得利。利得害人。孰不趨利而避害。何不辨其所得。

務本

福壽全書曰。護體面。不如重廉恥。求醫藥。不如養性情。立黨與。不如昭信義。作威福。不如篤至誠。多言說。不如慎隱微。求聲名。不如正心術。恣豪華。不如樂名教。廣田宅。不如教義方。

人能捐百萬錢嫁女。而不肯捐十萬錢教子。能盡一生之力求利。不肯輟半生之功讀書。寧竭資財以媚權貴。不肯舍此微以救貧乏。此天下之通惑也。

嫁女爭尚華侈。最是敝俗。其原蓋由於一二巨族。

惟婦言是用。互相誇耀。而市井無識。遂尤而效之。故其流日甚耳。不思資裝豐備。大半是無益妄費。且適予吾女以驕妬之藉。知者不為也。誠使巨室為民望者。相戒勿蹈舊習。儉而中禮。此俗不禁自革矣。

張侗初先生曰。吾家却金堂。舊有四箴。先太史本其意而潤飾之。箴曰。士大夫當為子孫造福。不當為子孫求福。謹家規。崇儉朴。訓耕讀。積陰德。此造福也。廣田宅。結姻援。爭什一。鬻功名。此求福也。造福者澹而

長求福者濃而短。士大夫當為此生惜名。不當為此
生市名。敦詩書尚氣節。慎取與謹威儀。此惜名也。競
標榜邀津貴。務矯激習模稜。此市名也。惜名者靜而
休。市名者躁而拙。士大夫當為一家用財。不當為一
家傷財。濟宗黨廣東修救荒。儉助義舉。此用財也。縻
宮苑教歌舞奢燕會聚寶玩。此傷財也。用財者損而
益。傷財者滿而訕。士大夫當為天下養身。不當為天
下惜身。省嗜欲減思慮戒忿怒節飲食。此養身也。規
利害避勞怨營窟宅守妻子。此惜身也。養身者畱而

大。惜身者。羶而細。

張鄮西先生曰。如今做人。要從苦中飽嘗一番。方有受用。故甘自苦。來甘始可久。福由德致。福始可保。

德是福之本。若離德而言福。古人謂之殃。

願體集曰。自責之外。無勝人之術。自強之外。無讓人之術。

人之謗我也。與其能辨。不如能容。人之侮我也。與其能防。不如能化。此爽者先後手之分。

遇詭詐人。變幻百端。不可測度。吾一以至誠待之。彼

術自窮。

所謂山鬼伎倆有盡。老僧不見不聞無窮也。若一露圭角。則適中其謀矣。

蘓黃門曰。衣冠佩玉。可以化強暴。深居簡出。可以却猛獸。定心寡欲。可以服鬼神。

市私恩。不如扶公義。結新知。不如敦舊好。立榮名。不如種隱德。尚奇節。不如謹庸行。

好辨以招尤。不若訥默以怡性。廣交以延譽。不若索居以自全。厚費以多營。不如省事以守儉。逞能以誨

習是錄 卷二 十一
妬。不若韜精以示拙。

十語九中。未必稱奇。一語不中。則愆尤駢集。十謀九成。未必歸功。一謀不成。則訾議叢興。君子所以寧默毋躁。寧拙毋巧。

徐勿箴曰。人之奔走勢利。如看花然。群芳初發。競賞繁華。及滿地落英。而人跡罕至矣。此亦天地自然之理。有識者勿以盛衰生感也。故君子貴堅松柏之操。不隨桃李之艷。

安分

顧凱之曰。人稟命有定分。非智力所移。惟應恭已守道。而闇者不達。妄意徼倖。徒虧雅道。無關得喪。人生貧富。自有定分。今日取多。豈遂為多。今日取少。豈遂為少。究竟是能吃虧者。未嘗不是討便宜處也。西疇常言曰。惟天生人。隨賦以祿。蠶方蟬而桑先萌。兒脫胞而乳已生。苟人之所為。尚未至自絕于天。天豈忍遽絕其生路。彼皇王求利如恐不及者。豈不謬用其心耶。

此語為憂貧廢學者着一鞭。不是為惰窳失業者
進一解。須與觀破小說載裴璞死後。其友遇之。裴
曰。上帝使吾為掠剩使。凡農勤求穀。商勤求利。士
勤求祿。技勤求錢。祇得分內所有。不增分外所無。
若不克勤。游惰放恣。并其分內之財而去之。語雖
不經。理自可信。不盡人事。而藉口知命。則為自絕
于天而已。

福壽全書曰。不求甚富。乃所以善貧。不求甚貴。乃所
以遠賤。不求甚榮。乃所以免辱。

老氏有云。罪莫大于可欲。禍莫大于不知足。又云。知足不辱。知止不殆。後世惟留侯康節深達此旨。雖顯晦殊塗。皆能超然于塵埃之外。良有以也。楊園先生曰。人于貧窮患難之日。在族黨固有救恤之義。在己益當奮厲。忍苦支撐。不可因而失足。及怨尤于人。此際站得住。便有來復之機。但帶得一個淡字來。一生歇宿有餘。但守得一個簡字定。一生受用不盡。世界素稱缺陷。即極如意中。亦有不如意事。看破此

理。而怨尤皆可氷釋矣。

天遊集曰。人家禍患。皆自多事生來。夫見高位多金者。未嘗不願與之交也。見勢崇權重者。未嘗不願與之接也。而不知一交一接之間。禍患由此而基焉。善于保安者。盍以清淨省事為本。窮通有命。徒自紛擾。何益哉。

凡權要人。聲勢赫奕時。我不可犯其鋒。亦不可與之狎。敬而遠之。全身全名之道也。

楊敬仲曰。仕宦以孤寒為安身。讀書以飢餓為進道。

居家以無事為平安。朋友以相見疎為久要。理到之言也。

呂叔簡曰。智者不與命鬪。不與法鬪。不與理鬪。不與勢鬪。

郭黎眉曰。余居鄉有三戒。一庶人不議之戒。凡時政得失。郡邑是非。絕不掛口。一非公不至之戒。杜門著書課子誦讀。當令士大夫聞名多而識面少。一庶人往役之戒。應輸稅賦。先為民望奉法急公。義當爾爾。士大夫居鄉者。當以此為法。

能改過。則天地不怒。能安分。則鬼神無權。

凡人遇達境。只宜安靜。不宜躁動。如舟遇逆風。必欲開船。鮮有不失事者。

非分之獲。無故之福。非造物為餌。即人世機穽。切須猛省。

陸鶴源曰。吾輩身列膠庠。其席豐履厚者。無論矣。或少艱窘者。則當思治生之道。惟書館為宜。不失本業。不妨功課。不壞心術。不扞禁網。外此則有利必有害。或致辱身賤行。斷勿為也。但為師者。必當以弟子之

終身為已任。誠心開導。勿弛緩。勿束縛。俟其自化。方稱善教。

世有浮薄之士。受人子弟重託。而終朝燕惰。虛糜館穀。或改真作偽。欺蒙父兄。甚者誘引頑徒。作諸不肖。止圖目前微利。不顧誤人終身。用心如此。則其獲罪于天。不待言矣。故前輩謂不究心教導。所得束修。與受賍同。此言要不為刺。

夏禹門授徒七十年。年九十五耳聰目明。人問治生長壽之術。答曰。治生即治心。惟忠恕之用至廣。如飲

食加意烹飪。固是誠心所致。即特供一醃菹。薦一小
蔬。亦無非誠心所在。偶或婢僕不精細。蠅蛆穢之。薪
艸混之。必不令生徒見。而婢僕受責。主人不安。飯有
蛛絲。壺有酒蛆。去之可也。我一生惟見主人之真誠。
而慮吾有不情諒也。

世之苛禮于主人。求備于館僕者多矣。此惟不知
忠恕之故也。請存此箴之。

魏氏查言曰。世間好糊體面之人。必是沒體面之人。
不如素位而行。率真做去的好。

小心

袁氏世範曰。勿謂一念可忽也。須知有天地鬼神之
鑒察。勿謂一言可輕也。須知有前後左右之假竊。勿
謂一時可欺也。須知有子孫禍福之報應。勿謂一事
可易也。須知有身家性命之關係。
初學備忘曰。君子存心于利物。究也已。未嘗不利。小
人肆行于害物。究也適足以害已。君子於物。喜其成
而惡其敗。然已亦得成焉。小人於物。樂其敗而忌其
成。然已常得敗焉。心之所感微矣。喜怒好惡。何可不

謹。

晦翁曰。要。做。好。人。則。上。面。煞。有。等。級。做。不。好。人。立。地。便。至。攀。躋。分。寸。不。得。失。勢。一。落。千。丈。只。在。放。與。謹。耳。纔。舒。放。即。當。收。斂。纔。言。語。便。思。簡。默。

吳。齊。仲。唾。餘。云。自。任。口。直。者。每。多。失。言。自。任。踈。懶。者。每。多。缺。禮。自。任。聰。明。者。每。多。遺。善。自。任。地。高。者。每。多。輕。人。

謝。疊。山。先。生。曰。人。生。最。不。幸。處。是。偶。一。失。言。而。人。不。察。偶。一。失。謀。而。事。倖。成。偶。一。恣。行。而。獲。小。利。後。乃。視。

以為常。恬不為意。遂釀成敗行喪檢。莫大之禍。
福壽全書曰。以患難心居安樂。以貧賤心居富貴。則
無往而不泰矣。以淵谷視康莊。以疾病視強健。則無
往而不安矣。

語云。力能勝負。謹能勝禍。

前輩云。人於受寵時。或有盛滿之意。即此便是禍機。
小器易盈。盈則必覆。物理然也。

康節詩云。閑居慎勿說無妨。纔說無妨便有妨。爽口
物多終作疾。快心事過必為殃。爭先徑路機關惡。近

後語言滋味長。揣其病後能服藥。不若病前能自防。
人利之事。我勿為。衆爭之地。我勿往。物極則反。害將
及矣。

凶年之穀。亂世之名。皆以少取為貴。

斧斤鳩毒。每在衽席之間。下石關弓。不離笑語之際。

人處斯世。無地不履。危機惟超然無欲者。可免此
累。今人每戀為安樂窩。宜其及也。

眉公曰。得意之事。勿再為。得意之地。勿再往。得意之
人。莫輕交。得意之語。莫輕發。執此道也。以往。可以息。

業養神。可以全身遠害。

于穀山先生曰。疾惡不可太嚴。草弊不可太盡。用人不可太驟。聽言不可太輕。處已不可太峻。張子韶曰。無以讐隙而語盡。無以新交而歡盡。無以小人過悞而法盡。毋以順風使帆而力盡。鋤奸杜惡。要放他一條去路。若使之一無所容。譬如防川者。盡絕其流。則堤岸必潰矣。尤翁云。非理相干。其中必有所恃。小不忍。則禍立至矣。古人云。忍字敵災星。不虛也。

不蹈無人之室。不入有事之門。不處藏物之所。非以避嫌。亦以遠禍。

救既敗之事者。如馭臨崖之馬。休輕策一鞭。圖垂成之功者。如挽上灘之舟。莫少停一棹。

救敗猶易。圖終更難。救敗祇宜安靜。圖終必出萬全。一或不慎。前功盡棄。古人所為兢。于此也。

徐勿箴曰。凡事只腳踏實地做出。必無後患。若脫空弄巧。時絀舉羸。飾美欺人。希圖名利。一時也有僥倖成事。日久敗露。身名俱喪者多矣。

大度

願體集云。有才而性緩。定是大才。有智而氣和。斯為大智。

關尹子有曰。賢愚心愈明。則友不交。好醜心愈明。則物不契。士君子須內精明而外渾厚。使好醜兩得平。賢愚共受益。纔是生成的德量。

中黃先生云。明不燭物。此言極有味。若洞然燭他。人之惡。不隨他轉而已。此外不宜發明太盡。凝重之人。德在此。福亦在此。山勢崇峻。則草木不茂。

水勢湍急。則魚鼈不畱。觀山水可以觀人矣。

量隘者。福不廣。氣輕者。祿不厚。志卑者。功不崇。行短者。年不長。此性與命相通。事與理相應。振古及今。未之或違也。

薄福者。必刻薄。刻薄則福益薄矣。厚福者。必寬厚。寬厚則福益厚矣。

或問。夏原吉曰。公量可學乎。公曰。某幼時有犯者。未常不怒。始恁于色。終恁于心。久則自然。殊不與人較。何嘗不自學乎。

量有出于性者。庾元規父子是也。有成于學者。顏
子之犯而不校是也。故量不盡可學。而氣質則無
不可化。人果能充我學識以養之。則鄙可寬。薄可
敦。何待言哉。
快書曰。人有不及。可以情恕。非理相干。可以理遣。佩
此兩言。可以使我遊于世。亦可使世遊于我。
我遊于世。猶屬有意。世遊于我。便鄙相忘矣。此聖
人廓然無我之學。叔寶恐見未及此。然由其言。亦
可得小解脫。

鄒南臯先生云。論人之過。當原其心。不可拘其迹。取人之善。當據其迹。不必誅其心。

羅近溪每見人有過。輒提起怪不得三字在口。謂吾儕日居善地。日親善友。猶不免于有過。而此輩或所遇不得其所。或所交不得其人。或未聞善言。或未見善行。其有過也。如何怪得他。

會心之語。當以不解之。無稽之言。是在不聽之耳。當樂境而不能享。畢竟薄福之人。當苦境而反覺甘。方是大受之器。

韓魏公以巍科而屈下僚。吏事愈勤。所以有真宰相之目。

觀富貴人。當觀其氣。緊如溫厚和平者。則其榮必久。而其後必昌。觀貧賤人。當觀其度量。如寬洪坦蕩者。則其福必臻。而其家必裕。

畜德錄云。觀人無他術。但作事神氣足者。不富貴。必壽考。其次莫若觀其所受。器窄易動。意形于色。得少為足。與好妄言。皆夭折貧賤之兆。譚子化書云。疑人者為人所疑。防人者為人所防。又

云。張機者入于機。設險者死于險。人處斯世。終日在
戈矛中。若一披甲擁盾。以不肖之心待人。未有不中
其傷者。唯一味清潔本原。守以靜而待以誠。渾渾焉
無所露。庶可免于患乎。

事有急之不白者。緩之或自明。人有撻之不從者。縱
之或自化。即家庭嫌隙。常有愈理而愈夢。緩之則如
故。不可不知也。
凡人辱我。定非無因。但思我有可辱。何怨于彼。我無
可辱。彼自妄耳。我又何怨。

陽明先生曰。仇人背後之議。不必較量。其是非皆足為我之箴規。

散花錄曰。受人凌辱。畏其勢而忍之者。不足為忍。無可畏之勢。而能忍之。是為真忍。

凡有橫逆來侵。思所以取之。故即思所以處之。法順而受之。不可便動性氣。故遭一番魔障。長一番練達。容一番橫逆。增一番器度。

蓮池大師曰。見人學好。多方贊成。見人差錯。多方喚醒。見人豐顯。則談其致福之由。見人苦難。則原其所

處之不幸。斯長者之道也。若忌成樂毀。何與人事。徒自壞心術耳。

乘舟而遇逆風。見揚帆者不無妬意。彼自處順于我。何干我。自處逆于彼。何關。究竟思之。都是自處煩惱。天運十年一換甲。人事十年一變遷。不須廣論古今。只以鄉黨十年前論之。其成敗興衰。何嘗有定。無遠識者。見他人有得意事。則妬忌之。失意事。則譏笑之。若明知事勢無定。方且自慮之不暇。何暇妬人笑人哉。

福壽全書曰。士人大病。只是自家不肯認差。所以多
鬱多怒。夫自責自修。有何不妙。而必以客氣爭勝也。
天下雄心客氣。都是資稟中大病。不會將學問工夫
磨練一番。却原是自家受苦。

讓古人。便是無志。不讓今人。便是無量。

胸中不平。輒要嗚吼。胸中有得。輒要暴白。自己杜門。
嫌人出路。自己絕滴。嫌人添益。自己吃素。嫌人用葷。
只是胸中欠大。

或問人議論多直。無含蓄。是氣不平否。程子曰。亦是

量窄。

議論多直。人幾以此自負矣。觀程子之言。恐不覺
爽然失也。以此知任情不學。都無是處。

徐勿箴曰。大有識力人。凡事提得起。看得破。算得到。
做得完。撇得開。放得下。才疎學淺者。斷不能也。

又曰。觀人於失意時。言詞舉止。絕無怨尤。憤激之氣。
此是大有學識者。度量過人遠矣。

魏氏查言曰。得意時不飛揚。失意時不隕穫。不但德
器過人。其人必有後福。

讀書

倪文節公曰。天下事利害常半。有全利而無少害者。惟書不論貴賤貧富老少。讀一卷有一卷之益。一日有一日之益。

陳仲醇云。世間極閑適事。皆須覓伴尋對。惟讀書一事。止須一人。可以竟日。可以窮年。環堵之中。而覽觀四海。千載之下。而覲面古人。其精微者。可以斧藻性靈。其宏肆者。可以開拓聞見。天下之樂。無過于此。而世人不知。殊可惜也。

待有餘而後濟人。必無濟人之日。待有暇而後讀書。必無讀書之時。

朱晦翁曰。家若貧。不可因貧而廢學。家若富。不可因富而廢學。貧若勤學。可以立身。富若勤學。乃以愈榮。顏黃門曰。人生幼小。精神專利。長成以後。思慮散逸。固須早學。勿失機候。然人以坎壈失于盛年。猶當晚學。不可自棄。世人昏冠未學。便稱遲暮。因循面牆。亦為愚耳。

黃山谷嘗曰。士大夫三日不讀書。則義理不交于胸。

中。便覺面貌可憎。言語無味。

朱子曰。觀書。須靜着心。寬着意思。沉潛反覆。將久自會曉得去。又曰。大抵觀書。先須熟讀。使其言若出于吾之口。繼以精思。使其意皆若出于吾之心。然後可以有得耳。又云。半日讀書。半日靜坐。如是三年。無不進者。嘗驗之一兩月。便不同。不作此工夫。虛過一生。殊可惜。

陳發交曰。以踐倫為主。則讀書有所歸。思亦不蕩。許魯齋為子弟說書。便問目前作何體驗。想見其平。

生講讀無一字一句。不從身心體貼過來。所以切寔有得。今人當以為法。

朱子曰。讀書須加沉潛之功。將義理去澆灌胸腹。漸漸盪滌去。那許多淺近鄙陋之見。方會見識高明。

呂升簡先生曰。世間事無大小。都有古人留下底法。程誦詩讀書時。便想曰。此可以為我某事之法。可以乘我某事之病。如此則臨事觸之。即應不待思索。

固是。然臨事亦須參互斟酌。不得泥古自悞。讀書須先正其本心是也。宅心厚者。博讀書義益資。

其善。存心薄者。泛識書字。愈肆其臆。然則非書累
人人自累書耳。

今人為學。若將此心。不放在書冊子上。只是不曾讀
書。若將此心。全放在書冊子上。仍是不會讀書。
讀書不可有欲了之心。纔有此心。便心在背後白紙
去了。無益。須小作功程。大施工力。如會讀得二百字。
只讀一百字。却于一百字中。猛施工力。理會仔細。排
徊顧戀。如不欲去。如此不會記性人。亦記得無識性
人。亦理會得。

讀書不可不先立程限。今之學者。不知此理。初時甚銳。漸漸嬾去。終至都不理會了。此只是當初不立程限之故。

許魯齋嘗曰。凡讀書。須于無疑中。看得有疑。更于有疑中。看得無疑。方是得力。

原明曰。凡讀書。不可專守師說。須于衆論不同中。尋取真是。方有長進。

初學備忘曰。讀得一二種書得力。其他便可沛然。但始初不可不擇。始初一誤。後來難挽。又曰。凡治一經。

必兼通他經。而後一經始得通曉。蓋文義有彼此觸發者。亦有詳略體用互為條貫者。若耳目逼窄。心思也便推廣不去。

陳仲醇曰。讀書不獨變人氣質。且能養人精神。蓋理義收攝故也。

祝石林曰。不善讀書者。讀萬卷書。無一字在胸中。善讀書者。讀萬卷書。亦無一字在胸中。

薛文清曰。讀史最有益。古人多有明見于是非之先。如事之成敗。人之賢否。皆預言于前。而具應于後。此

等殊。開人見識。

讀史。須設身處地。隨事觀理。勿存苛議之心。勿泥
成敗之迹。方有益。不然。則有眩瞶而已。何益之有。
東坡與王郎書曰。少年為學者。每一書皆作數次讀。
之。如欲求古今興亡治亂。聖賢作用。且只作此意求
之。勿生餘念。又別作一次。求事迹文物之類。亦如之。
他皆倣此。若學成八面受敵。與涉獵者。不可同日而
語。

多讀兩行書。少說一句話。讀得兩行書。說得幾句話。

讀書惟資談柄。後世陋習。然使義理積中。英華偶發。藹如穆如。有蘊有義。輒令聞者起十年讀書之想。故自可愛可敬。

顏氏家訓曰。借人典籍。皆須愛護。先有缺壞。就為補治。此亦士大夫百行之一也。徐勿箴曰。人家子孫。誰不要聰明。每見有聰明子孫。而不習教訓。作事乖方。其敗類更甚於不聰明者。人家子孫。豈可不讀書。每見博學能文。而於根本上全不理會。照管其闕失。更甚於不讀書者。所謂資質美。

又貴馴良。讀書多。又須明理也。

又曰。學者當明輕重緩急。道德之志重。則利欲之念輕。詩書之功急。則室家之情緩。讀書貴勤苦。若但求逸樂。終身不成。

又曰。子弟年少多才。當閉戶讀書。虛心受教。以厚其所養。若自恃才志。便欲馳騁名場。作為詩文。交結時流。獵取浮譽。入世之局面已成。則學問識見。止於如此。其積之也不厚。則發之也淺薄矣。

種德

曾子曰。人而好善。福雖未至。禍其遠矣。人而不好善。禍雖未至。福其遠矣。漢昭烈將終。勅後主曰。勿以惡小而為之。勿以善小而不為。長春真人曰。人在世間。方便第一。力到便行。蹉過可惜。見善不行。約有四過。有好名心。持于大而忽于小。有求報心。勉于始而怠于終。有自高念。不屑、為此。有自是念。不必拘、為此。

習是緒
大凡至誠極善之人。止有倉卒惻隱之真。若轉念
無聊。自顧不暇。便步。退縮。徒付之悼嘆而已矣。
願體集曰。天下之最討便宜者。莫如做好人。特人未
之思耳。

舉世好討便宜。只有此一種大便宜。討得者甚少。
可惜可惜。

司馬溫公曰。士君子盡心利濟。使海內少他不得。則
天亦自然少他不得。即此便是立命。
立命工夫。自當內求。但利濟。即是推廣仁術。不可

謂非立命之一端。

凡人施恩于不報之地。便是積陰德。以遺子孫。使人敢怒而不言。便是損陰德。處隨事皆然。當官尤甚。真西山曰。有親族不和。父子兄弟夫婦參商者。當曲為調停。使之和好。復其天性。實修真要路也。士君子貧不能濟物者。遇人痴迷處。出一言提醒之。遇人急難處。出一言救解之。亦是無量功德。宋有葛繁者。守鎮江。嘗語人曰。余始者日行一利人事。今四十餘年。未嘗廢。人問何為利人事。繁指

坐間欒子曰。此物置之不正。則戲人足。余為正之。
若人渴。與之盃水。皆利人事也。凡可以利益于人。
者。隨念隨時。隨人隨事。上自卿相。下至乞丐。皆可。
以行。惟行之悠久。大小如一。乃有利益。
附不費錢善事。鄉紳倡率義舉。正已化俗。有。
利地方事。盡心開導官長。有害地方事。竭力挽。
回上官。代達民隱。表節孝。懲忤逆。扶持。
風化。保護善良。嚴杜子弟僕從恃勢凌人。
不謀占人之產業。不謀奪人之風水。及欺壓隣。

旁風水。損人利己。不思報睚眦。不强借人財。
物。諭人和息。爭訟。士人以名節立身。以忠孝
訓俗。敬奉聖賢典籍。盡心啟發生徒。講鄉
約律法。勸戒愚人。事涉閭閻者。不輕下筆。事
屬陰私者。不攻發。不書誣揭。不寫稟狀。不
作離婚分別紙。不作昧心干証。不凌虐鄉愚。
不妄圈文字。欺哄無知。不自負才華。輕慢同學。
不造淫詞邪說。商賈討價。不欺哄鄉愚。不賣假
貨。貧人買米。不虧升合。出入不用輕重等秤。

大小斗升。凡病人所需貨物。不勒指高價。不謀奪生意。不忌人生意茂盛。多所讒毀。深夜買急需物者。不以寒冷不應。當銀足其等色。贖當少虧。諒情讓免。夏帳綿衣被等。尤宜哀憐。勿使不成。醫家遇急病。請到即行。勿計藥資謝儀。診脉不輕率。不因藥貴。輒減其分數。不因認錯病症。下藥委曲回護。不因祁寒暑雨。憚于遠赴。不因飲食晏樂。托辭不往。遇貧病者。捐藥救治。不反用藥。遲其痊愈。外科尤甚。不用霸道藥。求

其速效。不輕下劫藥。不賣假藥。誤人病。不
輕忽貧賤病人。不與同道水火。誤及病人。不
用墮胎藥。認病不真實。必令邀醫會議。不乘
舟輿。費人財物。貧賤家尤不可。公門不唆人興訟。
不無中生有索詐。不撥制官長生事。不捺案。
不妄引重律。不改輕作重。不嚇詐鄉愚。不
生枝節提人。不唆盜賊扳仇家。不輕敗人體
面。不受買囑。妄加鎖錮。不假公造語陷人。
入罪不下死煞語。不因無錢狠刑。不輕拘婦

人。不重脩刑具。不誣害良民。不逼婦女病
人到官。不迎官意虐民。不使人飢餓。軫恤
獄囚。矜原差誤。技術卜士。勸人免爭息訟。勸人
許愿行善。不用牲殺。星士算人壽命短促。運限
困厄。勸人積陰德。救物命。以延壽算。風鑑勸人
更換心腸。改過遷善。使相随心轉。挽回命數。堪
輿為人盡心擇地點穴。義惡直言。勸人平舊塚。勿
發掘大衆。曲行方便事。作事畏天地鬼神。軫
恤孤寡。不暴殄天物。用等出入公平。用秤

不捺分量。不行使低假銀。不恃乖欺拙。不
毀人成功。完婦女節。延續人嗣。不恃強凌弱。
不重富欺貧。不唆挑搬鬥。不辱人求勝。不
色藏禍心。不彰人短。不炫已長。勸人隣里親
戚和好。傳說善事。刊布善書。息人爭訟。歡
喜放生。不拋棄五穀。拾財寶還人。見人憂
患。善為勸慰。化人不嫖賭。不說誑語。不負
財物寄托。不欺殘疾愚蠢及老幼病人。遇人
急病無棲倚者。即代請醫調治。引過推善。伉

儼將乖者和好之。不忘人恩。不念人惡。不
助人為非。不謗佛道。凡遇人有急難。速救勿
遲。詳指路津。雪人冤枉。禁幼子女凌虐奴
婢。不聽婦人言。踈殘骨肉。興造顧鄰人風水。
贊成人好事。不買良為賤。禁無故宰殺。不
以祖父棺槨暴露。不以祖父遺骸頻遷。以妄希
富貴。不說傷風化語。說話存忠厚。不傲慢
尊長。不離間人骨肉。見諸聖像。瞻仰恭敬。
不毀禽獸巢穴及取卵。不勒捐佃戶。糕餅藥

餌。必先父母而後兒孫。扶貧濟困。必先本宗而後外族。婦人孝敬公婆。和睦妯娌。不凌虐婢妾。不殘害前妻及妾所生子女。不凌嫌丈夫。不搬鬪是非。穢物褻器。勿暴露神明前。及三光下。不厭女淹溺。不憤氣罵詈。不恃父母愛。欺凌兄嫂。不賣俏賣乖。不言人私情。嫡妾間。不造端讒毀。不暴殄衣飾。口不多言。身不出閫。

陳弇山曰。無用之人。苟存心于利己。于人必有所害。

點。有利于己。事雖善亦惡。况真為惡乎。此中正須檢

勿以人負我而隳為善之心。當其施德。第自行吾心。所不忍耳。未嘗責報也。縱遇險徒。止付一笑。

寧人負我。無我負人。

司馬溫公曰。平糶救人。是第一大方便。如有財者。于收成之時。廣行收糶。遇缺乏時。只依原價出糶。在已無損。在人極利。次或量減時價。均糶猶佳。林景陽好周貧乏。每曰。與其為無益。以求冥福。不若

為有益以濟生人。

捐財喜捨。自云功德。不知天尊不少。高堂大廈住。如來不少。錦繡金裝相。似可稍緩。惟脩崎嶇之路。建利濟之橋。為真正現在方便。

附富貴家費錢善事。

施棺木及綿袄蚊帳。

施

應驗丸散膏藥。配准君臣。不可以藥貴短少。

設

義塾鄉學。訓貧子弟。

凶歲設廠賑粥。

蠲免貧

人債負。

荒年代納極貧人錢糧。代贖極貧人寒

衣夏帳。

輕減利息。

施義塚地。

代完人婚姻。

冬施姜湯。教養無依孤獨。僱人拾字紙。代
繫獄者。完銀贖罪。遣嫁使女。不計身錢。贈畱
落異鄉人盤費。贖擄掠婦女及販賣水戶者。歸
還父母。不能殯葬者助之。糾衆立慈幼局。收
養棄兒。贖流落舊家子女。孀居守志。無所依
倚。而家貧不能自給者。歲時助給粟帛。以堅其志。
但同所親識與之可也。
前輩云。置買產業。寧虧富。不虧貧。寧虧明。不虧暗。寧
虧人于無事。不虧人于急難。

沈龍江先生曰。人家新卜得葬地。將安厝。忽掘見棺木。骸骨者。宜即與掩埋之。而權奉新柩為草舍。或即此少遠。另卜穴。或竟去此另卜穴。亦無不可。蓋論已葬與未葬。則我尚可圖。論有主與無主。則彼為可憐憫。故寧湏我費事。無遽攘泉下之人。使一旦流離失所也。安知不更有真地。襲穴以葬。毋乃不吉乎。但營域在近。原有坟墓者。但不逼近。亦自無妨。蓋生有隣人。死有隣鬼。其理一耳。

凡有望于人者。必先想已之所施。凡有望于天者。必

先想已之所作。

縱已能先施。望人終不宜太深。所謂報者。倦矣。施者未戢。將必至于交惡而後已。非盡人之無良也。昔龔幹安問龍潭老人曰。近世善惡報應。頗覺差池。豈蒼蒼者亦憤憤者耶。龍潭拍天而語之曰。此老雖不急性。却有記性。要其終觀之可也。今人偶行一善。便欲獲報。少不如意。則曰。天道難知。豈知人但不飢不寒。無灾無害。士得讀書。農得耕田。時開笑口。日少蹙眉。即此便是平安之福。不

然人欲無涯。世界缺陷。安得人。富貴利達者。
暗裏算人者。笑的是自家兒孫。空中造謗者。造的是
本身罪惡。

凡人之為不善者。造物未必即以所為不善之事
報之。而或于別一事報之。別一事又未必大不善
也。而得禍甚酷。天公揔前後算來。未嘗毫髮爽也。
李昌齡曰。禍福由自召。亦由自轉。念得則宿業可
破。善根可培也。

轉字是起死回生的金丹。凡人每不肯服。奈何。

徐勿箴曰。凡待家人。斷宜寬厚。飯食不飽。衣服不周。雖有良僕。亦思他去。若加以苛責。則人懷離畔矣。勢家悍僕。日受鞭扑。而不去者。畏其威。利其財也。主性剛暴。甘心忍耐。家門衰落。竭力扶持。歷盡窮苦。至死無他者。此真義僕。又曰。發福之家。祖宗必有隱德。作惡之家。子孫必然覆敗。

惜福

黃含仲曰。人無壽夭。祿盡則死。是以一身財祿。皆有定數。服用之際。豈宜過享。

寸絲尺布。慎勿妄殘。木屑竹頭。皆為有用。福當如是惜。

福壽全書曰。少必老。盛必衰。富必窮。樂必哀。此天地必至之事也。如何能從中挽回。曰。只是留他常有餘。人生天地間。語不可說盡。事不可做盡。心不可使盡。衣不可穿盡。飯不可吃盡。福不可享盡。留此有

餘者以貽子孫。善乎楊襄毅之父瞻曰。見在之福。積自祖宗來者。不可不惜。將來之福。貽于子孫者。不可不培。又曰。現在之福。如點燈。隨炷隨竭。將來之福。如添油。愈添愈潤。人生未老而享。既老之福。則終不得老。未貴而享。既貴之福。則終不得貴。

昔人謂近日膏粱子弟。雖梳頭裹脚。亦使奴僕代為。不知閑却兩手何用。如此舉止。名位安得尊崇。壽命安得長永。即不得貴不得老之說也。

隻字必惜。貴之本也。粒米必珍。富之源也。微命必護。壽之根也。片言必謹。德之基也。

張允祥先生曰。予見邇來惜字文。刊布甚廣。即焚字之會。亦各膳僧取拾。然人知惜字于有字之後。不知惜字于未有字之先。此誠探本之論也。因取其意而廣之。

一。凡下筆有顛倒是非。使人啣冤者。此字當惜。
一。凡下筆有一時快意。使他人永無生路者。此字當惜。

一凡下筆有出入關人性命者。此字當惜。
一凡下筆有代駕虛詞。構人爭訟。及揭款醜詆者。此字當惜。

一凡下筆有破人婚姻。離人骨肉者。此字當惜。

一凡下筆有悞人功名。關人名節者。此字當惜。

一凡下筆有凌老貧。欺孤寡者。此字當惜。

一凡下筆有訐人閨閻。發人隱微者。此字當惜。

一凡下筆以詩歌譏誚。犯人所忌者。此字當惜。

一凡下筆有挾私懷隙。故賣直道。毀人成謀者。此字

當惜。

一凡下筆。有謀人自肥。傾人活計者。此字當惜。
覺世箴曰。凡臨事。着一苟字。便壞。自身享用。著一苟字。便安。

世人于自身享用。偏不肯苟。于是立身行已。遂無一不苟矣。何不三復斯言。

文雅社約曰。凡燕器。勿用純金純玉。銀器雖似無妨。然亦誨盜之資也。當筵有失。稍一根求。賓客從人。必皆動色。招尤啟釁。且自茲始。反不若陶甕瓦缶。為便。

也。

楊園先生曰。親友慶弔。稱情量力。以誠為主。不以文為先。世俗浮靡。非禮之禮。不足循也。

士君子立身。自有本末。豈可苟同流俗。但相習既久。復古為難。去其太甚者。可也。

徐勿箴曰。每作一事。必使之寬然有餘地。不獨自身福厚。還可留與後人。急位狹隘。好行刻薄者。事上自家算盡。安有餘澤及人。

廣慈

慈者。萬善之本。誠欲積德累功。不獨愛人。兼當愛物。
佛氏書曰。人家小兒頑戲。凡蠅蝶鳥雀之類。切宜禁
戒。非惟傷生。且熾其殺心。長大不知仁恕。又云。人于
行住坐卧間。見一切衆生。投身死地。當方便救護。使
得生全。又云。魚子不經鹽漬者。三年猶可活。人苟隨
時隨地。以濟物為念。固不待買物放生。而所活已無
量矣。
一切禽獸。皆有人性。皆有眷屬。或飛或走。射而取之。

如人離家出遊。路被殺害。妻子盼望。其慘何如。古人有詩云。勸君莫打三春鳥。子在巢中望母歸。此言深可警惕。

蘓子瞻詩曰。捲簾歸乳燕。穴窓出痴蠅。愛鼠常留飯。憐蛾不點燈。吾輩嘗作此觀。何患民胞物與之念。不從此生。傷人害物之心。不從此滅。


蓮池大師曰。慶生不宜殺生。已身始誕之辰。乃母身懸命之日。正宜廣行善事。何得殺害生靈乎。祈禳不宜殺生。人有疾。祀神以求福。不知已欲求生。反殺他

命。神其來享乎。生子不宜殺生。人無子則悲。有子則喜。曷為慶我子生。令他子死。心其安忍乎。營生不宜殺生。世人為衣食故。或獵或漁。或屠宰。我觀不作此業者。亦衣亦食。未必皆凍餒而死也。殺生營生。神聖所殛。以殺昌裕。百無一人。何苦而不別求生計乎。所論極是。但如俗情常銅牢不可破何。

司馬溫公曰。草妨步則薙之。木碍冠則芟之。其他任其自然。相與同生天地間。各遂其生耳。高景逸先生曰。滋味入口。經三寸舌間耳。自喉以下。

珍羞粗糲。同于冥然。奈何以三寸之爽。輕戕物命乎。
絕葷是好事。亦是難事。不必勉強。但不食牛犬。不
特殺。似為得中。

海昌夏君佐鐫字



珍貴紅粉同于冥然奈何以三寸之舌與輕微物命乎
此輩是好事亦是難事不必勉強但不食中太不
特發以為得中

